

Ágætu íbúar og aðrir gestir

Ég vil fyrir hönd bæjarstjórnar Reykjanesbæjar bjóða ykkur velkomin til þessa 17. júní fagnaðar. Það er mikill heiður að standa hér á þessari hátíðlegu stund. Það eru einmitt hátíðisdagar eins og í dag sem nýtast til að leggja til hliðar daglegt þras, endurmeta gildi okkar, minnst þess góða og líta til framtíðar. Ég ætla að leyfa mér í dag – eins og aðra daga – að vera jákvæð og bjartsýn og ætla því að fara yfir nokkur atriði sem ég tel að sé mikilvægt fyrir okkur sem samfélag að hafa í huga.

Í dag fögnum við sumrinu og þeim tækifærum sem mæta okkur á næstu misserum. Á uppbyggingartímum er hvergi betra að vera en í sveitarfélagi þar sem tækifærin leynast allt í kring og þar sem íbúar, starfsfólk og stjórnendur eru með uppþrettar ermar tilbúnir að hefjast handa. Í Reykjanesbæ er gott að búa, tækifærin eru hér út um allt og það er okkar að grípa þau og láta stórar hugmyndir verða að veruleika. Við sem samfélag erum öll í sama liði og þannig eigum við að nálgast verkefnið. Með skýrum sameiginlegum markmiðum og samvinnu munum við ná enn meiri árangri.

Reykjanesbær er fjórða stærsta sveitarfélag landsins og ég hef sagt það áður að við þurfum að þora að taka pláss. Hingað flytja nýir íbúar nánast á hverjum degi því hér er góð grunnþjónusta, hagstætt að búa sér heimili og við erum úthverfi höfuðborgarsvæðisins. Á undanförunum árum hefur átt sér stað mikill viðsnúningur í rekstri sveitarfélagsins og ljóst er að nú þarf að skipuleggja til framtíðar og viðhalda kröftugri uppbyggingu.

Margt jákvætt hefur gerst í fjármálum sveitarfélagsins sem má þakka góðri samstöðu í bæjarstjórn, mikilli og góðri vinnu stjórnenda og starfsmanna við endurskipulagningu efnahags Reykjanesbæjar og síðast en ekki síst góðum skilningi og þolinmæði bæjarbúa.

Það er ánægjulegt að segja frá því að á fyrri hluta síðasta árs náðist að klára fjármögnun til að Reykjanesbær gæti leyst til sín eignir Eignarhaldsfélagsins Fasteignar sem Reykjanesbær hefur leigt frá árinu 2003. Samkvæmt leigusamningnum var um að ræða 31 fasteign þar sem rekstur skóla, leikskóla, æskulýðs- og íþróttastarfs, tónlistaskóla og fleira fer fram. Í kjölfarið á þeirri vinnu var leigusamningnum sagt upp og eignirnar því aftur komnar í umsjá sveitarfélagsins. Þetta er virkilega mikilvægt fyrir okkur sem samfélag.

Annað sem gleðilegt er að nefna hér er sú staðreynd að okkar öflugra starfsfólki hefur fjölgað í takt við fjölgun íbúa og að menntun þeirra og færni hefur einnig orðið meiri og stefnum við nú mjög hátt með metnaðarfullum starfsmönnum.

Innleiðing stefnu sveitarfélagsins sem ber heitið „Í krafti fjölbreytileikans“ gengur einnig samkvæmt áætlun en rauði þráðurinn í henni er að *“Reykjanesbær*

*sé fjölskylduvænn bær sem þroskar og nærir hæfileika allra í gegnum öflugt skóla-, íþrótt- og menningarstarf. Íbúar sinni fjölbreyttum störfum í vistvænu fjölmenningsamfélagi sem einkennist af framsækni, virðingu og eldmóði.”*

Það er einmitt það sem við eigum að muna og leggja áherslu á sem íbúar. Við sem samfélag höfum tekist á við ýmsar áskoranir en á sama tíma höfum við orðið vitni af ótrúlegri samstöðu, trausti og bjartsýni. Nú ætlum við að halda áfram veginn af sama krafti og að hafa samvinnu, vináttu og heiðarleika að leiðarljósi því þá munu næstu misseri færa okkur enn bjartari tíma, ný tækifæri og öryggi til að njóta þeirra hluta sem skipta okkur mestu máli.

Við sem íbúar höfum í mörg ár rætt um það hvað það skiptir okkur miklu máli að stofnunin sem er mér hér á vinstri hönd sé til staðar og grípi okkur þegar við þurfum á henni að halda. Nú er komið að þeim tímapunkti að við hefjum raunverulegt sameiginlegt átak okkar íbúa, bæjarstjórnar, stjórnenda og starfsfólks á HSS til að tryggja okkur örugga grunnheilbrigðisþjónustu. Bygging nýrrar heilsugæslu er að hefjast og við ætlum nú öll saman að slá skjaldborg um stofnunina okkar og tryggja nauðsynlegar úrbætur svo við löðum til okkar enn fleira fagfólk eins og þar starfar.

En þetta er ekki það eina sem framundan er því við munum sjá uppbygging víða í sveitarfélaginu og til að nefna dæmi er það fjölgun hjúkrunarrýma á Nesvöllum þar sem byggt verður 60 rýma húsnæði sem nú þegar búið er að taka skóflustungu af, allt að þriggja milljarða framkvæmd er hafin við skipaþjónustuklasa í Njarðvíkurhöfn þar sem hundruð starfa skapast, uppbygging íbúðahverfa heldur áfram sem og uppbygging Stapaskóla þar sem m.a. mun rísa glæsilegt íþróttahús og sundlaug, fjölgun leikskóla er í vinnslu og miklar úrbætur á Myllubakkaskóla reisulega skólanum hér fyrir framan okkur standa yfir.

Auk alls þessa þá getum við svo sannarlega verið stolt af fjölbreytta menningarlífinu okkar og þeirri grósku sem þar ríkir, blómstrandi íþrótt- og tómstundastarfi sem íbúum á öllum aldri stendur til boða, fjölbreyttri þróunarvinnu í menntastofnunum okkar svo tekið er eftir því, atvinnulífið er heldur betur að taka við sér á ný, fyrirtæki í sveitarfélaginu eflast og blómstra og ný fyrirtæki sjá hag í að byggja upp starfsemi í sveitarfélaginu, ferðaþjónustan blómstrar með tilheyrandi samlegðaráhrifum í veitinga og þjónusturekstri sem við njótum öll góðs af og ekki má gleyma þeirri stórbrotnu náttúru sem við búum við þar sem við höfum kraftinn í jörðu og hafi hér allt í kringum okkur. Allt þetta gefur okkur svo sannarlega tilefni til að vera jákvæð og bjartsýn.

Kæru íbúar, í dag er fallegur dagur og framundan er fjölbreytt dagskrá. Ég vil óska öllum til hamingju með daginn, við skulum njóta hans og munum að framtíðin er björt í Reykjanesbæ.